

**KERATAN AKHBAR-AKHBAR TEMPATAN
TARIKH: 3 FEBRUARI 2016 (RABU)**

Bil	Tajuk	Akhbar
1.	MOSTI mahu graduan wujudkan peluang pekerjaan untuk diri sendiri	BERNAMA
2.	Polis tunggu laporan siasatan kes langgar lari enam penganut Hindu	BERNAMA
3.	Stop misleading advertising	New Straits Times



MOSTI Mahu Graduan Wujudkan Peluang Pekerjaan Untuk Diri Sendiri

MELAKA, 2 Feb (Bernama) -- [Kementerian Sains, Teknologi dan Inovasi \(MOSTI\)](#) menyeru graduan menjadi individu yang mampu mewujudkan peluang pekerjaan untuk diri sendiri dan rakan sebaya selepas tamat pengajian.

Bagi merealisasikan hasrat itu, [Timbalan Menteri berkenaan Datuk Dr Abu Bakar Mohamad Diah](#) menyarankan graduan supaya melibatkan diri dalam bidang perniagaan termasuk makanan dan minuman yang mempunyai peluang cerah pada masa hadapan.

"Graduan perlu kreatif dengan memanfaatkan segala ilmu dan kemahiran yang diperoleh ketika menuntut di universiti, kolej atau politeknik untuk mencipta peluang pekerjaan.

"Sistem pendidikan negara dilihat semakin maju dan melahirkan ramai usahawan berjaya serta mempunyai nama yang boleh dibanggakan," katanya kepada pemberita selepas mesyuarat Jawatankuasa Penasihat Industri Politeknik Merlimau dan majlis Menandatangani Nota Kolaborasi di Billionaire's Concept Cuisine di sini, hari ini.

Turut hadir Pengarah Politeknik Merlimau Zolkarnain Jobshi dan Pengarah Urusan Billionaire's Concept Cuisine Ahmad Akmal Zaaba Omar.

Abu Bakar juga menyarankan alumni institusi pengajian tinggi yang berjaya dan mempunyai perniagaan sendiri supaya membantu graduan mereka dengan menyediakan peluang pekerjaan.

Usaha itu adalah platform baik yang dapat membantu graduan mendapatkan pekerjaan malah membantu mengurangkan pengangguran di negara ini, katanya.

Sehubungan itu, beliau meminta institusi pengajian tinggi supaya bekerjasama dengan alumni mereka yang berjaya dalam bidang masing-masing terutamanya perhotelan, keusahawanan dan perniagaan untuk membuka peluang pekerjaan kepada graduan mereka.

Terdahulu, Abu Bakar menyaksikan majlis menandatangani kolaborasi Politeknik Merlimau bersama pihak industri iaitu Billionaire's Concept Cuisine, Kementerian Pelancongan Malaysia, Tourism Malaysia, Destinasi Travels and Tours, VMI Sdn Bhd dan QSR Brand.

Sementara itu, Zolkarnain berkata perjanjian nota kolaborasi itu merangkumi latihan kompetensi pihak industri kepada pelajar dan pensyarah Politeknik Merlimau dalam usaha meningkatkan kemahiran serta kebolehpasaran graduan.



Polis Tunggu Laporan Siasatan Kes Langgar Lari Enam Penganut Hindu

KUALA LUMPUR, 2 Feb (Bernama) -- Polis menunggu laporan [Jabatan Kimia](#) dan Unit Forensik bagi melengkapkan siasatan kes langgar lari yang mengorbankan tiga penganut Hindu di Lebu Raya Seremban-Kuala Lumpur pada 23 Jan lepas.

Ketua Polis Kuala Lumpur Datuk Tajudin Md Isa berkata laporan itu dijangka siap sepenuhnya dalam masa terdekat dan akan dihantar kepada pendakwa raya bagi tujuan pendakwaan.

"Ketika ini, polis masih menunggu laporan penuh dari jabatan berkenaan supaya pendakwaan terhadap pemandu kereta yang melanggar lari dapat dilaksanakan segera.

"Saya jangkakan laporan siasatan ini akan siap dalam masa terdekat ini," katanya kepada pemberita selepas menghadiri Perhimpunan Bulanan Peringkat Ibu Pejabat Polis Kontinjen Kuala Lumpur bagi Februari di sini, hari ini.

Dalam kejadian 8 pagi itu, tiga mangsa lain turut cedera apabila sebuah kereta mewah merempuh mereka yang sedang berjalan di lorong kecemasan lebu raya berhampiran susur keluar Desa Petaling.

Tiga mangsa yang maut ialah Saravanan Krishnan, 45, Papa Sinnah, 63, dan Cinnakanoo Kannan, 50, manakala rakan mereka, Megaswaran Palanisamy, 40, Darrshen Devara, 18 dan S.Anjalai Devi, 44, cedera parah.

Kesemua mangsa merupakan sebahagian daripada kira-kira 40 penganut Hindu yang berjalan kaki dari Seremban menuju Batu Caves dalam ritual perarakan sempena perayaan Thaipusam yang disambut pada 24 Jan.

Pemandu kereta berumur 25 tahun yang disyaki terlibat dalam insiden itu menyerahkan diri di Balai Polis Trafik Jalan Bandar pada hari sama.

Kes itu disiasat di bawah Seksyen 41 (1) Akta Pengangkutan Jalan 1987.

-- BERNAMA

